

**Հ Ա Ն Գ Ի Ս Տ**  
**ԱՐԺԱՆԱՊԱՏԻՎ Տ. ԱՐՈԱՀԱՄ ՔԱՀԱՆԱ**  
**ՏԵՐ-ԱՐՈԱՀԱՄՅԱՆԻ**  
**(1878—1958)**



Ապրիլի 7-ին, երկուշաբթի օր, երկարատև և ծանր հիվանդությունից հետո, 80 տարեկան ակտիվ հասակում, իր հայրենի Բջնի գյուղում ի Տեր հանգյալ արժանապատիվ Տ. Արազամ քահանա Տեր-Արազամյանը:

Հանգուցյալը ծնվել է 1878 թվականին Ախուրյանի շրջանի Բջնի գյուղում, քահանայի ընտանիքում: Նախնական կրթությունն ստացել է գյուղի դպրոցում, իսկ եկեղեցական ուսումը՝ Սևանա վանքում: 1919 թվականին ձեռնադրվում է քահանա Արարատյան թեմի

առաջնորդական փոխանորդ խորեն եպիսկոպոս Մուրադբեկյանից՝ Երևանի Ս. Սարգիս եկեղեցում, իր գյուղի՝ Բջնի եկեղեցու վրա, իր հանգուցյալ հոր տեղը:

Հանգուցյալը համեստ, հավատավոր և նվիրված քահանաներից էր, ուներ քաղցր ձայն և Հայ եկեղեցու շարականների խոր հմտություն: Հաճույք էր լսել նրա եկեղեցական երգեցողությունը:

Նա երկար տարիներ քահանայագործել է նաև Արզաքանդում և Ալափարսում և ամեն տեղ սիրվել ու հարգվել իր ժողովրդի կողմից: Իր երկարատև և անբասիր ու բարվոք քահանայագործության համար պարգևատրվել է քահանայական լանջախաչով երջանկահիշատակ Տ. Գևորգ Զ Կաթողիկոսից, 1954 թվականին:

Հանգուցյալը վերջերս իր առաջացյալ տարիքի պատճառով հանգստյան էր կոչվել, ստանալով կենսաթոշակ վեհափառ Հայրապետի կարգադրությամբ:

Ապրիլի 10-ին, Մայր Աթոռի լուսարարապետ գերաշնորհ Տ. Սահակ արքեպիսկոպոսը, արժանապատիվ Տ. Թադևոս, Տ. Գրիգոր և տեղի ծխատեր Տ. Արսեն քահանաների և բարեշնորհ Կարապետ սարկավագի մասնակցությամբ, Բջնիում կատարեց հանգուցյալի վերջին օծումը և իր դամբանական քարոզում վեր հանեց հանգուցյալի բարի վաստակը և մաքուր անունը:

Հանգուցյալը թաղվեց Բջնիի պատմական վանքի բակում, իր հոր գերեզմանի կողքին:

«Յիշատակն արդարոց օրհնութեամբ եղիցի»:

